

Gojri News Bulletin

06 July 2025

1700 Hrs

ایویننگ گو جری نیو ز بلیٹن مو رخہ 06 جولائی 2025

یوہ آکا شوانی جموں بے طار ق ابرار تے محمد اکرم چودھری تیں خبر سُنو۔
پہلاں خاص خاص خبر۔

*1۔ وزیر اعظم نریندر مو دی اپنا 5 مُلکاں غا دورہ غا چوتھا مرحلہ مانہہ
برازیل پُچ گیا ہیں جت وے اج 17 ویں بریکس چوٹی اجلاس مانہہ شرکت
کریں گا۔

*2۔ 7 ہزار 2 سو 8 امرناتھیا تریاں ور مشتمل پنجوون جتھو اج جموں تیں
روانہ ہوؤ۔

*3۔ یوم عاشورہ اج مذہبی عقیدت تے احترام سنگ منایو جا رہیو بے۔

*4۔ تے سیاحت غا سیکریٹریاں غی پہلی 2 روزہ قومی کانفرنس کل تیں
ایس کے آئی سی سی مانہہ شروع وے گی۔

خبراں غی تفصیل نال پہلاں محمد اکرم چودھری۔

PM Brazil

وزیر اعظم نریندر مو دی ریو ڈی جنیریو مانہہ برکس اجلاس مانہہ شمولیت
کریں گا۔ جیٹو اج شام تیں شروع ہو رہیو بے۔ جس غو مقصد ممبر ملکاں مانہہ
تعاون نانہہ بدھانو بے۔ بریکس اجلاس غو 17 وون شمارو عالمی سطح ور
اصلاحات، موسمیاتی تبدیلی غی للکار، مصنوعی ذہانت سمیت دیگر امور
ور گل بات کرے گو۔ یوہ صحت غا شعبہ مانہہ تعاون بدھان، عالمی مسائل غا
حل واسطے مصنوعی ذہانت غا اخلاقی استعمال، موسمیاتی تبدیلی غی للکار
نال نمژن واسطے عالمی ضروریات نانہہ پورا کرن غی خاطر کثیر الجہتی

بینکاً غی اصلاآ اور متوازن تے جامع عالمی طرز حکمرانی نانہ فروغ دین واسطے اک فریم ورک بنانو چاوے۔ اس اجلاس غا حاشیہ ور وزیر اعظم غی طرفوں دیگر رہنماواں غے نال دو طرفہ گل بات غو وی امکان ہے۔

Gujarat Amit Shah

امدادِ باہمی غا مرکزی وزیر امت شاہ نے کہیو ہے جے مُلک غی اقتصادی ترقی مانہ کا پورٹو سو سائٹیاں گو اہم کردار ہے۔ جناب شاہ نے وزارتِ امدادِ باہمی غا 4 سال مکمل ہون غا موقع ور گجرات کا آند مانہ امول اور این ڈی ڈی بی کا بکھ بکھ ترقیاتی کماں غو افتتاح کرتاں اس گل غو اظہار کیو ہے۔۔۔ بائٹ۔۔ انہاں نے مزید کہیو کہ 2 لکھ نواں پی اے سیز، شاکیرتا یونیو رسٹی، غذائی اجناس غی پیداوار تے فروخت نال متعلق 3 کاپو رٹو سو سائٹیاں تے ڈیری نال متعلق 3 کاپو رٹو سو سائٹی مل غے مُلک غی تعاون تحریک نانہ مضبوط بنایں گی۔ شاہ نے ڈاکٹر شیامہ پر ساد مکهرجی نانہ اُن غا یوم پیدائش ور خراج عقیدت پیش کیو ہے۔ اور کہیو ہے کہ اُن غے بغیر کشمیر بھارت غو آٹوٹ انگ نہ ہوتو۔

Yatra Batch

جموں غا بھگوتی نگر یا تری نواس بنیا دی کیمپ توں 7 ہزار 2 سو 8 یا تریاں ور مشتمل پنجووں جتھو اج سویرے وادی کشمیر واسطے روانہ ہوؤ ہے۔ یہ یا تری آج سویرے 3 سو 7 گڈیاں غا اک قافلہ مانہ بنیا دی کیمپ توں روانہ ہوؤ ہے۔ اس جتھا مانہ 5 ہزار 2 سو 58 مرد یا تری، 1 ہزار 5 سو 87 کالسری، 30 بچہ تے 2 سو 77 سادھو، 56 سادھوی شامل ہیں۔ جن وچوں 3 ہزار 1 سو 99 یا تری بالنتال گا بنیا دی کیمپ واسطے روانہ ہوا۔ جد کہ 4 ہزار 9 یا تری پہلگام بنیا دی کیمپ واسطے روانہ ہوا ہیں۔ جتوں یہ یا تری بابا برفانی غا درشن واسطے اپنو اگلو سفر طے کریں گا۔

Pilgrims Vande Bharat

حالیہ امرناتھ یا ترہہ گا آغاز نال یا تری تے سیاح سرینگر تے کٹڑہ نانہہ جوڑن آلی نویں متعارف کرائی گئی وندے بھارت ریل گڈی غو بھر پور فائدو چاہ رہیا ہیں۔ جدید ترین تے تیز رفتار ٹرین نے اس مقدس سفر مانہہ اک نویں جہت غو اضافو کیو ہے۔ جس نال یا تریاں نانہہ جموں کشمیر غا دلکش مناظر غے ذریعے آرام دہ، محفوظ تے وقت غی بچت غو تجربو مل رہیو ہے۔ مسافراں نے سہولیات اور ہموار سواری ور خوشی غو اظہار کیو۔ سفر نانہہ بہترین تے یا د گار قرار دیتاں واں کافی سارہ عقیدت منداں نے دسیو کہ وندے بھارت ریل گڈی نے نہ صرف سفر مانہہ آسانی پیدا کی ہے بلکہ ان غا مجموعی یا ترہہ غا تجربہ نانہہ وی بدھایو ہے۔

Muharram

مُلک غا بکھ بکھ حصاں مانہہ اج عاشورہ غو تہاڑو عقیدت تے احترام سنگ منایو جا رہیو ہے۔ یوہ تیہاڑو پیغمبر اسلام غا نواسا حضرت امام حسین تے اُن غا ساتھیان غی شہادت غی یا د مانہہ منایو جا ئے۔ جنہاں نے کربلا مانہہ حق، سچ تے انصاف غو سر اُچو رکھن واسطے اپنی جاناں غو نذرانو پیش کیو تھو۔ وزیر اعظم نریندر مودی نے حضرت امام حسین غی قربانی نانہہ یاد کیو تے اک سوشل میڈیا پوسٹ مانہہ کہیو جے حضرت امام حسین نے سچا رستہ ور چلن ور زور دیتو ہے اور لوکاں نانہہ مشکلاں غے باوجود سچائی ور چلن غی ترغیب دتی۔ جموں کشمیر غا لیفٹنٹ گورنر منوج سنہا سرینگر مانہہ یوم عاشورہ غا موقعہ روایتی زولجناح غا جلوس مانہہ ہزاراں لوکاں غے نال جلوس مانہہ شامل ہوا۔ یوہ جلوس بوٹا کدل غا علی پور علاقہ تیں شروع تے سرینگر قصبہ مانہہ زڈی بل مانہہ اختتام پزیر ہوؤ۔ اس دوران سکیورٹی غا سخت انتظامات کیا گیا تھا۔ لیفٹنٹ گورنر نے عزاداراں نانہہ پانی پیش کیو اور جلوس غی شروعات کرن تیں پہلاں رسمی طور ور زولجناح ور روایتی چادر چڑھائی۔ زولجناح پیغمبر اسلام حضرت محمد ﷺ غا نواسا حضرت امام حسینؑ غا گھوڑا غی نمائندگی کرے۔

مزید خبراں نال طارق ابرار- ور اُس تیں پہلاں یوہ پیغام-(یہ خبر تم آکاشوانی جموں تیں سُن رہیا ہیں، تے یہ خبر مہاری ویب سائٹ نیوز آن آئیر ڈاٹ گو ڈاٹ ان ور وی دستیاب ہیں، اس تیں یہ خبر مہاری مو بائل ایپ تے ڈی ٹی (ایچ ور وی دستیاب ہیں)

Tourism Secretaries

جموں کشمیر مانہ سیاحتی پروفائل نانہ مزید ترقی دین واسطے مرکزی وزارت سیاحت کل تیں ایس کے آئی سی سی سرینگر مانہ تمام ریاستاں تے مرکزی زیر انتظام علاقہ سیاحتی سیکریٹریاں غی دو روزہ کانفرنس غی شروعات کر رہی ہے۔ جموں کشمیر مانہ پہلی بار قومی تقریب سیاحت غا شعبہ مانہ آپسی تعاون ور مبنی پالیسی سازی تے اسٹریٹجک منصوبہ بندی ور اعلیٰ سطح غی گل بات واسطے ملک پھر تیں سیکریٹریاں تے سربراہان نانہ اکھٹو کر رہی ہے۔ اس تقریب مانہ ثقافت تے سیاحت غا مرکزی وزیر، مرکزی داخلہ سیکریٹری تے سیاحت وزارت غا سیکریٹری سمیت معزز شخصیات غی شرکت غو امکان ہے۔ کانفرنس مانہ قومی سطح غا اہم پالیسی شعباں جن مانہ سیاحت بارے بجٹ 26/2025 غو اعلان وغیرہ شامل ہے ور توجہ مرکوز کی جائے گی۔ اس باوقار تقریب غی تیاریاں غا سلسلہ مانہ گذشتہ روز کمشنر سیکریٹری یشا مدگل نے ایس کے آئی سی سی وی موجود تھا۔ جنہاں نے کمشنر سیکریٹری نانہ لاجسٹک، مہمان نوازی تے حفاظتی انتظامات بارے تفصیلی جانکاری دتی۔

Baba Sidh Gorla

بابا سیدھ گوریاناتھ جی میلو شمال بھارت غو سب تیں مشہور تے منایا جان آلا سالانہ میلان وچوں اک ہے یوہ میلو اج سانہ ضلع غا رام گڑھ علاقہ مانہ مذہبی عقیدت تے جوش و خروش نال شروع ہوؤ۔ عقیدت منداں نے مذکورہ مقام ور بنی وی جھیل مانہ سویرے شان کیو تے متھو ٹیکیو۔ اس میلہ مانہ بھارت غا بکھ بکھ کوناں تیں عقیدت مند آگے آشیرواد حاصل کریں۔ میلہ بارے مزید جانکاری نال سانہ تیں مہارا نمائندہ سہتپال شرما۔۔۔ بانٹ۔۔۔

Satish Sharma

خوراک، شہری رسدات، امور صارفین، نوجوان خدمات تے کھیڈاں اور انفارمیشن ٹیکنالوجی غا وزیر ستیش شرما نے اج مقامی تاجراں نانہہ ڈیجیٹل طور ورتن با اختیار بنان تے نوجواناں نانہہ کاروباری اقدامات مانہہ شامل کرن غی اہمیت ورتن زور دتو۔ وے ایف ٹی آئی آئی ٹریڈرس 2025 کنکلیو مانہہ خطاب کر رہیا تھا۔ سرینگر غا شیر کشمیر انٹرنیشنل کنونشن سینٹر مانہہ اس کنکلیو غو اہتمام فیڈریشن آف ٹریڈ اینڈ انڈسٹری آف انڈیا نے واکل فار لوکل غا بینر بیٹھ کیو ہے جس غو مقصد مقامی تاجراں تے صنعت کاری نانہہ باندو دینو ہے۔ اس کارفرنس مانہہ تجارت تے صنعت غا مرکزی وزیر پیش گوئی تیں علاوہ، چیرمین نیشنل ٹریڈرز ویلفیئر بورڈ سنیل سنگھی، ممبر پارلیمنٹ راجیہ سبھا غلام علی کھٹانہ، کمشنر سیکریٹری صنعت و تجارت وکرم جیت سنگھ نے وی شرکت کی۔ اس موقعہ ورتن ستیش شرما نے کاروباری سیل، کھیڈاں تے نوجواناں غی بھلائی بہتری پروگراماں غے تحت ہنر غی تربیت تے ڈیجیٹل اسکیننگ پلیٹ فارم غے ذریعے نوجواناں سنگ چلن آلی اقتصادی ثقافت نانہہ باندو دین ورتن زور دتو۔

DC Jammu

جموں غا ضلع مجسٹریٹ سچن کمار ویشیا نے گذشتہ روز تحصیل پرگوال غو دورو کیو تے محکمہ مال غا کم کاج غو جائزولیو تے نال ہی جاری فیلڈ سرگرمیاں غو معائنو کیو۔ اپنا دورہ غے دوران ڈی سی جموں نے عوامی خدمات غی فراہمی غو جائزولین واسطے کئی گرائیاں غو وی دورو کیو تے متعلقہ افسراں نانہہ بہتر کارکردگی تے جوابدہی واسطے موقعہ ورتن ہدایات جاری کیں۔ انہاں نے فعال انتظامیہ تے موثر عوامی خدمات غی فراہمی ورتن زور دتو۔

Para Archery

بیجنگ مانہ 2025 پیرا تیر اندازی چمپئن شپ مانہ بھارتی پیرا تیر اندازاں
غی طرفوں گذشتہ روز 2 طلائی تمغہ جتن سنگ بھارت غا کُل تمغاں غی تعداد
7 ہو گئی ہے۔ شیتل دیوی تے جیوتی غی کالسریاں غی کمپاؤنڈ ٹیم نے نے
چین مانہ 143-148 نال ہرا غے طلائی تمغہ حاصل کیا۔ ہر ویندر سنگھ تے بھا
ونا نے 4-5 شوٹ غی سنسنی خیز جیت تیں بعد مخلوط ری کروو مانہ اک ہو
ر طلائی تمغو حاصل کیو۔ بھارت نے مرداں غا ری کروو اوپن تے میکسڈ
کمپاؤنڈ اوپن مقابلان مانہ 3 چاندی غا تمغی وی حاصل کیا۔ راکیش کمار نے 2
چاندی غا تمغہ جتیا۔ مرداں غی کمپاؤنڈ ٹیم مانہ سٹیم سندر تے میکسڈ ڈبل
مانہ جیوتی شامل ہیں۔

اس غے نال ہی خبراں غو یوہ بلیٹن ختم ہوؤ۔